

四庫全書

集部

欽定四庫全書

聖祖仁皇帝御製文第二集卷五目錄

勅諭

諭吏部

諭刑部

諭大學士勒德洪明珠

諭大學士明珠王熙宗德宜余國柱學士禪布

吳喇岱額爾赫圖色稜格舜拜吳興祖徐廷

璽盧琦

諭大學士勒德洪明珠王熙宗德宜余國柱學士禪布額爾赫圖色稜格舜拜吳興祖徐廷

璽盧琦

諭大學士勒德洪明珠王熙宗德宜余國柱學士禪布額爾赫圖色稜格舜拜吳興祖徐廷璽盧琦

諭內閣

諭大學士勒德洪明珠

諭大學士勒德洪明珠

諭內閣

諭大學士明珠學士禪布額爾赫圖舜拜

諭尚書鄂爾圖郎中伊爾克圖溫保

諭八旗都統三品以上官

諭滿洲管漢軍副都統叅領等

諭內閣

諭內閣

諭大學士勒德洪明珠學士齊檣額爾赫圖舜  
拜多奇凱音布趙山

諭戶部

諭刑部

諭大學士明珠

諭大學士明珠

諭內閣等衙門

諭大學士勒德洪等

諭大學士勒德洪等



欽定四庫全書

聖祖仁皇帝御製文第二集卷五

勅諭

諭吏部

國家設官分職原以綏靖地方惠養黎庶督撫為封疆大吏表率屬員尤須才守兼優綰練政務方於吏治民生實有裨益巡撫于成龍自為縣令以至郡守素秉清操愛民盡職遂從臬司起擢巡撫簡任以來孤介自持



清廉益著釐奸剔弊扶弱鋤強境內謐寧旗民允服殊  
為可嘉從優特加太子少保以為廉能稱職者勸爾部  
即遵諭行特諭康熙二十六年四月十二日

諭刑部

時已入夏天氣亢暘雨澤尚爾愆期農事似有可慮或  
因刑名案件內無知惟法審擬失當情罪不符致干  
天和亦未可定茲特遣勒德洪余國柱達哈塔科爾坤  
王日藻徐廷璽等會同三法司將已結重案現在監禁

者逐一詳加審鞠如有罪可矜疑者即與查明事由開列具奏務期情法允協不致淹滯監斃以副朕欽恤刑獄感召休祥之至意特諭康熙二十六年四月十五日

諭大學士勒德洪明珠

汝等可傳旨於八旗滿洲蒙古都統等令於各旗中阿思哈尼哈番等官以下拖沙喇哈番等官以上或微末秩員又或初為部院官後襲父兄世職隸旗下者果有其人正直才具優長而敬謹小心為國勤勉素行端方

者一旗之中或三四人或一二人以其真知灼見保舉  
奏聞引見於部院用之此保舉之人既用後與其所保  
奏乖違不符者其保舉之都統副都統等連坐重罪之  
必不姑恕如各旗無可舉之人則已或恐坐舉主心懷  
畏懼隱其真正才賢不肯保奏甚無謂也可令各該旗  
都統副都統於二十五日以前所舉之人引見奏聞康熙  
二十六年四月二十三日

諭大學士明珠王熙宋德宜余國柱學士禪布吳

刺岱額爾赫圖色稜格舜拜吳興祖徐廷璽盧

琦

聽政之時科道侍班言官自恐失儀心切畏懼以致條  
奏者甚少凡啓奏官員果有失儀朕自降旨或其人自  
為檢舉科道侍班罷之誠是且科道官多起自疎遠進  
退周旋未經嫻習朕欲以其建言為要務雖有小過朕  
亦不計也其宣旨於九卿詹事科道此後科道侍班其  
已之康熙二十六年四月二十六日

諭大學士勒德洪明珠王熙宋德宜余國柱學士  
禪布額爾赫圖色稜格舜拜吳興祖徐廷璽盧  
琦

各項採買估計價值前浮冒欺飾者甚多是以數日令  
其核減今所減者太過恐致苦累可令察訪時價量度  
估計康熙二十六年五月初二日

諭大學士勒德洪明珠王熙宋德宜余國柱學士  
禪布額爾赫圖色稜格舜拜吳興祖徐廷璽盧

琦

凡諸修造工程其估計在前今照新例銷算又今所定  
例凡物料匠役工價核減太過至於苦累皆未可必前  
此修造已完者其仍照原估計銷算凡各項物料所值  
之價俱訪時價量度估計銷算康熙二十六年五月初  
二日

諭內閣

八旗滿洲蒙古漢軍官員人等家僕開戶於旗分及佐

領並民籍已為官者捐納候缺者捐納俊秀以上無論已補官未補官者令各旗都統副都統叅領佐領等逐一嚴察明晰開送吏部吏部具聞請旨康熙二十六年五月初四日

諭大學士勒德洪明珠

雅克薩地官兵中烏喇寧古塔兵可還至愛渾城盛京兵可還至墨爾根地並令屯駐息馬過冬其事宜議政王貝勒大臣會同詳議以聞康熙二十六年七月初六

日

諭大學士勒德洪明珠

黑龍江官兵口糧關係至重屢次轉運米數并黑龍江  
墨爾根地方接續所種米數宜加察明自盛京等處廣  
運米石以為久遠裨益之計此皆當周詳區畫又發遣  
彼處游手無事之人甚多其口糧作何酌給耶前至黑  
龍江一帶乃徑直通衢往來轉輸斷不致稍有阻滯如  
蔡毓榮等巨富之人並殷實之家槩予口糧殊覺未當



彼處漢軍皆著察出披甲當差游手無事之人可分設官莊廣開田畝以為恒產令戶兵二部賢能司官迅往逐一察明到日確議具奏康熙二十六年十月初一日

諭內閣

今年各省鄉試正副主考朕所未識者頗多止據本內開列之人酌量點用今覽各省進呈題名錄內所出題目未當者甚多如福建省試官所出第三場策內問臺灣一段並不知地方形勢事宜蒙昧出題悖謬已極此

外各省亦有未當者漢大學士學士等將各省呈覽題目及題名錄詳加檢閱若有悖謬最甚者察出叅奏康熙二十六年十月初三日

諭大學士明珠學士禪布額爾赫圖舜拜

今當軍政之年聞斂取兵丁以為定規餽送兵部此等情事朕不傳旨指明然亟應禁絕又聞每年奏銷兵馬冊亦稱定規斂取兵丁餽送該部此皆勒索於軍民者也其弊亦宜永行禁止可傳諭兵部康熙二十六年十

月十八日

諭尚書鄂爾圖郎中伊爾克圖溫保

黑龍江至為要地兵丁勞苦朕罔不知曩者俄羅斯漸次入犯占踞我達呼里索倫等處擾害邊疆四十餘年無如之何後備足軍食永戍黑龍江以困逼之俄羅斯遂窘迫至極乃屢次求和今彼之使臣已來尚未曾至苟糧儲不足則如沙爾瑚達塔海等之往征而不能成功矣此事未經年遠朕親所聞知且亦衆所共悉也朕

所委曲區畫自盛京等處轉輸糧食及令所種米穀積貯至裕彼地大臣官員皆不思撙節濫給於無用之人苟且草率希圖軍儲罄盡勢必將彼等撤回彼等誠能以身家性命力保俄羅斯斷不來犯朕自撤回之也我之官兵撤回俄羅斯大衆難以齊來彼地將軍官員固皆稔知然或一二人或十餘人陸續聚集於黑龍江松花江之間構造木城盤踞其地則我取之維艱是俄羅斯為主兵而我反為客兵也今我惟多貯糧食永戍官

兵則我兵得逸而俄羅斯兵為勞矣如此則俄羅斯零星來犯斷所不能欲大隊侵入則彼糧食何能挽運耶若黑龍江我兵不行永戍自松花江黑龍江以外所居民人皆非吾有矣爾等皆係選擇差遣往至彼處殫心竭慮務期為久遠充裕之計詳加籌議惟此一舉也亦無事再遣矣康熙二十六年十月二十四日

諭八旗都統三品以上官

凡人之行莫先於孝近者漢軍居父母之喪親朋聚會

演劇飲酒呼盧鬪牌儼如筵宴毫無守制之體至孝服  
鞍轡等類所用素帛皆異常華美喪禮止當服用粗惡  
豈宜華美耶居喪演劇滿洲所無漢人亦未有特漢軍  
為然耳百行以孝為大如此所行以為孝道其他又何  
足觀也又漢軍外官赴任每借京債整飾行裝務極奇  
麗且多攜僕從致債主抵任索逋復謀贍僕從衣食勢  
必苛斂於民以資用度且親朋債主疊往任所請託需  
索不可數計是官雖一人實數人為之以致朘削小民

民何以堪又漢軍外官不能騎射乃自稱行獵多帶鷹犬歇宿邨莊滋害於民禽獸本在山野豈在邨莊耶又漢軍服用多僭越非分終日羣居以馬弔飲酒為樂此等物力從何而出有非苛取諸民者乎漢軍習尚之惡已至於極如原任總兵諾邁原任提督哈喇庫祖永烈等於任所多買良民帶歸原任總督張長庚原任巡撫張德地韓世琦等皆貪婪虐民居官甚劣今著漢軍都統副都統等凡有居喪演劇飲酒呼盧鬪牌者照賭博

例嚴行禁止在外漢軍官員任所有親朋債主前往請託需索貽累小民者亦令察訪指名題叅朕此諭旨專為敦厚風俗陶淑人心而起使漢軍居官者皆似總督范承勲巡撫于成龍之善朕又何諭之有此旨令徐廷璽傳諭康熙二十六年十月二十六日

諭滿洲管漢軍副都統叅領等

向因漢軍習俗不善故以爾等補授漢軍副都統叅領欲訓練其騎射導率以矩範一如滿洲也近見並不教



以騎射凡事不能使之倣法滿洲反有不肖者恐嚇漢軍指摘其短希圖索詐此朕所深悉嗣後爾等務加悛改善為教訓漢軍可耳康熙二十六年十月二十六日

諭內閣

凡叅劾貪官其受賄作弊之處因未曾親覩無所憑據畏縮而不行叅劾者甚多今間有彈章亦止據風聞叅劾耳豈有身與之通同受賄作弊而顧肯叅劾之耶向者原有風聞糾彈之例

世祖皇帝時及輔政大臣停止今再行此例貪官似有  
微懼若有挾讐叅劾者審明果係挾讐自有反坐之典  
在可著九卿確議具奏康熙二十六年十一月二十日

諭內閣

近見支用修造等項奏銷錢糧時該部不准駁回者甚  
多此等奏銷屢行駁回官員未必捐橐補給亦止派取  
民間耳如此則百姓愈苦向因需用孔亟故奏銷者未  
即准行今公帑並非匱乏之時奏銷案件不必駁回應

即完結此等事不行駁回在官員雖稍獲便利而於百姓乃大有裨益也可傳諭九卿詹事科道康熙二十六年十一月二十日

諭大學士勒德洪明珠學士齊穡額爾赫圖舜拜  
多奇凱音布趙山

今聞外藩蒙古出喀倫哨地有侵害搶擄喀爾喀之巴爾呼等蒙古者甚多以後著嚴行禁止毋使妄行其下理藩院確議以聞康熙二十六年十一月二十一日

諭戶部

朕惟自古帝王統御萬方又安九有單心懷保節愛攸  
先期於物力充裕爰以振業黎元俾膏澤旁流咸蒙美  
利朕自御極以來軫恤民依力圖休養惟理財為裕國  
之大經蠲貸為愛民之實政歷年敦崇節儉嚴核浮冒  
蓋欲為布德行惠之資頻年以來各省錢糧雖已次第  
蠲免但江蘇所屬各郡縣為財賦重地額徵錢糧甲於  
他省且累歲輸將供億効力維勤茲用大沛恩膏除漕

項錢糧外所有康熙二十七年應徵地丁各項錢糧俱著蠲免二十六年未完錢糧亦悉與豁除又陝西省錢糧前雖已行蠲免但念該省人民用兵之際轉輸餽餉効力可念再宜加恩以弘樂利其康熙二十七年應徵地丁各項錢糧及二十六年未完錢糧亦著俱與蠲免尔部速行該地方官通行曉諭務使小民均霑實惠以副朕愛育蒼生至意如有不肖官吏借端朦混及私行重徵者該督撫指名題叅從重治罪如該督撫徇隱不

行糾舉或經叅奏或被告發定行一併從重治罪尔部  
即遵諭行特諭康熙二十六年十一月二十六日

諭刑部

朕侍奉

太皇太后朝夕承歡祇遵

慈訓竭誠奉養今者

聖躬偶爾違豫朕夙夜滋懼寢食靡寧仰冀

上天眷顧俯垂默佑惟思好生以迓

天庥寬大以延遐壽所有內外問刑衙門現監重辟人  
犯除十惡死罪及貪官光棍不赦外其餘已經奉旨監  
候死罪重犯槩行減等發落以昭朕祈

天永佑至意尔部即遵諭行特諭康熙二十六年十一  
月二十七日

諭大學士明珠

太皇太后聖體違和以來醫治萬端罔克奏效未即安  
善甚為可慮朕靡朝靡夕不勝憂懼茲欲躬詣

郊壇虔行禱祀保佑

太皇太后慈躬和豫永獲康寧可將朕意傳示九卿康熙二十六年十一月二十九日

諭大學士明珠

自

太皇太后違和以來朕在宮中無日不虔潔精誠默行祈禱乃

太皇太后聖體大漸似無一分可以冀望矣如稍有可



望之機亦不敢起躬禱

天壇之念今竟毫無冀望何計可施惟有竭抒誠悃叩  
祈

上天之眷佑耳並非沾取虛名徒事粉飾為也皇皇上  
天其可欺乎將此諭旨向諸臣傳示之康熙二十六年  
十一月二十九日

諭內閣等衙門

朕自

太皇太后違豫以來心懷憂慮日侍

左右檢方調藥親侍飲饌

太皇太后寧憩之時朕惟隔幔靜俟席地危坐一聞

太皇太后聲息即趨至榻前凡有所需手奉以進因此  
晝夜不能少離

太皇太后屢有德音命朕回宮少宜自愛朕念幼蒙

太皇太后撫養教訓三十餘年罔極

深恩難以報答今見病體依然五內焦灼莫知所措朕

躬寢處何暇顧計覽奏具見大小臣工愛君誠悃但當此時不竭心盡力少抒仰報之忱異日雖欲依戀

慈闈竭朕心力豈易得耶所奏已知之康熙二十六年十二月十一日

諭大學士勒德洪等

朕忽遭大故五中潰糜非不知恪遵

遺誥守身為重勉自節哀強進飲食但悲從中來情實痛切莫由自主以至昏迷即欲少餐饘粥亦不能下咽

非故却不御覽奏具見誠悃朕當強支自愛卿等無須  
過慮康熙二十六年十二月二十七日

諭大學士勒德洪等

據奏元旦請朕還宮人主宮殿原多可以因時移蹕若  
在庶民遭此大故所居止於一室又遷避何所回宮斷  
不可行卿等念切愛君恐朕哀毀過甚諄懇再三勉從  
所請強節哀情康熙二十六年十二月三十日

聖祖仁皇帝御製文第二集卷五

欽定四庫全書

聖祖仁皇帝御製文第二集卷六目錄

勅諭

諭禮部

諭學士舜拜

諭宗人府

諭內閣

諭吏部

諭大學士伊桑阿梁清標學士齊璠舜拜趙山  
拜里阿喇密石文桂盧琦

諭大學士伊桑阿王熙梁清標學士凱音布趙  
山拜里阿喇密朱都納薩穆哈石文桂王封  
滌

諭內閣

諭大學士伊桑阿王熙梁清標學士凱音布拜  
里朱都納薩穆哈吳什巴石文桂王封滌

諭大學士伊桑阿等

諭都統瓦岱

諭大學士伊桑阿學士薩穆哈石文桂

諭大學士伊桑阿尚書阿蘭泰紀爾塔布侍郎

額爾赫圖

諭大學士伊桑阿學士凱音布薩穆哈吳什巴

石文桂

諭湖廣巡撫丁思孔



諭學士凱音布吳什巴石文桂

諭學士凱音布吳什巴石文桂

諭內閣

諭大學士伊桑阿學士凱音布朱都納薩穆哈

邁圖索諾和

諭大學士伊桑阿王熙梁清標學士凱音布朱

都納邁圖索諾和彭孫適李振裕郭琇

欽定四庫全書

聖祖仁皇帝御製文第二集卷六

勅諭

諭禮部

大行太皇太后聖德母儀昭示萬國昔奉我

皇祖太宗文皇帝贊宣內政誕育我

皇考世祖章皇帝顧復劬勞受無疆休大一統業暨朕

踐祚方在冲齡仰荷我

聖祖母訓誨恩勤以至成立晨昏依戀三十餘年方期  
游享遐齡茂膺繁祉詎意適遭違豫奄忽

上賓朕哀疚之深五中摧絕昊天罔極報德實難緬惟  
厚澤深仁信足炳傳簡冊非薦隆號莫展哀誠宜恪遵  
彝憲恭上

尊謚垂示無窮以慰朕尊親之意著內閣翰林院詹事  
府會同擬奏其應行典禮爾部詳察議奏特諭康熙二  
十七年正月初七日

諭學士舜拜

朕心切哀慕不與羣臣接見日久九卿會議有一二重要事朕心甚為不安新授兩巡撫又未啓行來日強出令其領取訓旨各速之任又此時諸曹重事亦令入奏康熙二十七年正月二十二日

諭宗人府

自古帝王展親睦族列爵錫封原欲選賢建能旌別淑慝俾咸知勸勉慶流奕世此國家之常經獎勵之至意

也朕篤念親親恩禮罔替年至十五即行授封但誼屬  
本支必皆飭躬砥行端良醇謹益自刻勵動不踰則始  
無忝於宗潢今親王以下奉恩將軍以上年至十五不  
問賢否槩予封爵以致視為故典罔知激勸嗣後親王  
以下奉恩將軍以上子孫應俟其年至何歲作何辨其  
賢否定其品級等第始應授封著議政王貝勒大臣及  
親王以下奉恩將軍以上會同確議具奏特諭康熙二  
十七年二月初九日

諭內閣

朕躬不逮往時自

太皇太后聖體違和以來深覺迷憤極切憂勞頃所言者旋即遺忘昨一二要事折票簽付與筆帖式後竟遺忘反覆思之不復記憶為何事輾轉不寧至於中夜忽復憶得乃大驚惕以謂已批發矣急呼筆帖式問之奏云已折票簽尚未批發於是心始稍舒或念所及數欲降旨令召其人至而所念及之事所思之言乃皆遺忘

無如之何此所書勅諭乃朕所自為而昨所更易者今日視之似有遺漏爰加增益更訂雖復更訂仍覺未盡其意似有遺缺者以此之故因念凡諸奏事朕見所未到者亦未可知凡部院事皆於國家關係重要所奏聞之事大臣庶官益當敬慎大學士學士亦宜詳加看閱此旨宣示九卿此所書不必別謄有所更易即於此增入奏聞康熙二十七年二月初十日

諭吏部

國家建官分職經理庶政必須矢志精白大法小廉各  
守職業實心任事庶無負拔擢簡用之意朕親理萬幾  
歷有年所於尔部院大小官員行事無不深知為臣子  
者既儋爵受祿榮及父母庇其子孫家能自給便當知  
足無致隕越前已屢頒諭旨嚴行申誡又復諄諄面諭  
訓誨再三今在廷諸臣自大學士以下有職掌官員以  
上全不恪勤乃職惟知早出衙署偷安自便三五成羣  
互相交結同年門生相為援引傾陷商謀私事徇庇同



黨圖取貨賂作弊營私種種情狀確知已久九卿詹事科道皆朕委任之員凡遇會議自當各出已見公同商酌乃一二欲行倡率之人持議於前衆遂附和於後雷同草率一意詭隨又其甚者雖在會議之班茫無知識隨衆畫題希圖完結廷議如此國是何憑又有當集議時緘默自容及至僨事巧於推卸朕深惡此等推諉苟容之輩亦屢加嚴飭至於用人關係重大羣臣賢否難以周知故遇緊要員缺特令會同推舉原期為國得人

實有裨益亦欲令被舉者警心易慮恐致溺職累及舉者因而勉自刻勵九卿諸臣宜體朕心從公選舉方為不負委任乃歷來所舉官員稱職者固有而貪黷匪類往往敗露此皆瞻顧情面植黨納賄所致凡茲情弊朕非不知前者班布爾善阿思哈等身為大臣所行悖亂致干憲典遂行正法至今猶耿於懷是以比來大小官員背公徇私交通貨賄朕雖洞見而不即指發冀其自知罪戾痛加省改庶可終始保全詎意積習深錮漫無

悛悔如審擬蔡毓榮一案庇護挽救瞻徇黨類百計營求因朕具悉其奸私謀未遂近差色楞格往審張汧所叅事情朕面諭色楞格張汧居官貪穢尔宜嚴行審出迨差回時詢問色楞格奏稱臣於此案盡心研鞫若有失實甘受誅戮及覽其奏案惟恐累及保舉張汧之人竟為庇護朕知內閣原擬票籤將保舉張汧官員并未議及業行折出又念張汧審結定罪之後自然發露因仍用原籤票發又靳輔下河工程屯田之案朕早已察

其情弊特遣佛倫等前往勘議今所議殊屬偏私且凡會議之時科爾坤佛倫等務執已見持論好勝苟非懷挾私情何以力排衆議朕亦曾面加誡諭未見畏悔如此積弊愈久愈深物議沸騰輿情憤激以致言官列款叅奏本應發明其事以肅官方因不忍遽行加罪大臣且用兵之時有効勞績者故免其發明勒德洪明珠著革去大學士交與領侍衛內大臣酌用李之芳著休致回籍余國柱著革職科爾坤著以原品解任佛倫熊一

瀟等著解任於河工案內完結嗣後大小臣工各宜洗滌肺腸痛改陋習潔已奉公勉盡職掌以副朕寬大矜全咸與維新之至意爾部即遵諭行特諭康熙二十七年二月十一日

諭大學士伊桑阿梁清標學士齊穡舜拜趙山拜里阿喇密石文桂盧琦

近見科道官叅人之疏甚多果有大貪大惡何不早爲叅奏有等人聲言糾叅妄行嚇詐希圖利已以致各官

不能自安此等嚇詐之人許即行首告吏部都察院通行曉諭康熙二十七年二月二十日

諭大學士伊桑阿王熙梁清標學士凱音布趙山拜里阿喇密朱都納薩穆哈石文桂王封滌

盛京寧古塔沿途驛站往來官員多索車馬鞭撻苦累驛站人役所在多有嗣後如此苦累驛站者管理驛站官即行報部驛站官瞻徇情面不報事發並驛站官治罪其下兵部令定例議奏康熙二十七年三月十五日

諭內閣

今時略旱矣而欽天監所上章四月朔日食甚應行應革之事當何如耶九卿詹事掌印不掌印科道官集議焉朕面見令奏之康熙二十七年三月二十三日

諭大學士伊桑阿王熙梁清標學士凱音布拜里朱都納薩穆哈吳什巴石文桂王封滌

夫死而殉日者數禁之矣今見京師及諸省殉死者尚衆人命至重大而死喪者惻然之事也夫修短壽夭當

聽其自然何為自殞其身耶不寧惟是輕生從死反常之事也若更從而旌異之則死亡者益衆矣其何益焉此後夫死而殉者當已其旌表王以下至於細民婦人從死之事當永永嚴禁之若有必欲從死者告於部及該管官具以聞以俟裁定議政王貝勒大臣九卿詹事科道官會同確議奏焉康熙二十七年四月初六日

諭大學士伊桑阿等

朕荷



太皇太后撫育深恩罔極難報追思悲痛不能自己應  
行慎終典禮務竭誠敬式展哀衷朕今躬送雖已奉安  
從茲不復再覩

梓宮思慕之忱更為靡盡爾等以大禮告成懇請所奏  
已知之康熙二十七年四月二十日

諭都統瓦岱

茲以湖廣督標裁兵鼓噪特命爾瓦岱為振武將軍馳  
驛前往江寧爾到江寧帶領江寧滿兵京口漢軍兵丁

京口鎮標水師營兵江南江西督標火器兵丁戰船酌  
量帶領水陸并進星速前往湖廣與荊州將軍侯巴渾  
德江寧將軍博濟副都統烏黑商酌而行務須平定亂  
兵撫安黎庶毋得遲延致令滋蔓仍宜剿撫並用嚴加  
偵探毋得疎虞大兵一到抗拒不順者戮之有先被賊  
脅從即時迎降者俱免誅戮有能擒殺賊渠投誠者分  
別陞賞須嚴禁兵將申明紀律經過地方毋得騷擾百  
姓歸順良民加意撫綏以副朕定亂救民之意其行間

將領功績及重罪俱察實紀明彙奏各官有犯小過者當即處分至於驍騎校以下無論大小罪過俱商酌徑行處治務期速平鼓噪兵丁安定地方尔受茲重任宜殫竭心力早奏捷功欽哉故諭康熙二十七年六月初十日

諭大學士伊桑阿學士薩穆哈石文桂

近日科道官無條奏者建言乃科道專職祇在不存私心耳可傳諭科道官有條奏事赴暢春園面奏康熙二

十七年六月十一日

諭大學士伊桑阿尚書阿蘭泰紀爾塔布侍郎額

爾赫圖

喀爾喀與厄魯特互相攻戰我邊塞地方宜加防守翁  
牛特巴林克西克屯四子部落等旗皆當酌量遣兵以  
防守我蘇牛忒之喀倫地方可令議政王貝勒大臣會  
議具奏康熙二十七年六月十九日

諭大學士伊桑阿學士凱音布薩穆哈吳什巴石

文桂

襄陽總兵官兵南陽總兵官兵可酌量調遣取道孝感縣向武昌進發又將軍瓦岱兵及荊州兵亦宜兩路夾進王貝勒大臣會議以聞康熙二十七年六月十九日

諭湖廣巡撫丁思孔

楚省督標裁兵煽亂無知兵民或被迫脅或為招誘一時倉猝入其夥黨官兵一到若不分別加誅朕心深為不忍應速行開示此等亂兵原係食糧營卒各有室家

均屬朝廷赤子乃為一二倡亂奸徒煽惑自新無路情  
屬可憫今特開一面以廣好生如有悔罪投歸即行免  
罪仍准安插務令得所果能將倡亂賊首擒獻軍前或  
殺賊來歸者仍與論功敘錄毋得心懷疑畏自失事機  
致罹大法尔奉勅諭即刊刻告示通行曉諭務令翻然  
悔悟爭先投首蚤平鼓噪夥黨奠安民生副朕寬大矜  
全至意故勅康熙二十七年七月二十三日

諭學士凱音布吳什巴石文桂

荊州大兵防戍專備不虞滿兵往已多日矣並未殺賊立功而綠旗兵數經大戰破賊此後提督徐治都所上破賊章䟽擬嘉獎溫旨議敘票簽以進滿兵破賊章䟽擬照常票簽以進令大學士知之康熙二十七年七月二十四日

諭學士凱音布吳什巴石文桂

頃驛站筆帖式等所報我兵近抵武昌賊渠以三人遁去武昌城中民羈賊渠妻子獻城降由此觀之城中賊

皆已降餘賊略盡地方提督總兵綠旗官兵自可追擒  
撫輯江寧京口荊州諸路兵仍赴武昌則轉輸供應民  
力維艱滿洲漢軍及調集綠旗兵皆令各歸本汛又遇  
難官民之妻子或恐株累可令其地巡撫察明奏聞汝  
等傳旨大學士頒諭焉康熙二十七年七月二十四日

諭內閣

徐治都兵數經大戰其被創者陣亡者必不少矣且皆  
自諸營鎮調集者若歸本汛則清察必稽時日其速遣



戶兵二部賢能司官會同提督巡撫察明即武昌賞賚之庶窮乏兵卒得沾實惠不致後有為多為少遲延時日之弊矣康熙二十七年八月初二日

諭大學士伊桑阿學士凱音布朱都納薩穆哈邁  
圖索諾和

兵部考武官射合例者方記冊錄用或有前在行間顯著勞績若以考校不合例之故遂不得見用事屬可矜已屢有諭旨且射而中者人材皆優射不中者人材皆


劣不可以此一槩論也若執此用人則人材優而有勞者終身不得見用實可憫矣又聞兵部閱射有以中者為不中以不中者為中諸情弊其飭兵部堂官自是以後其嚴之其慎之康熙二十七年十一月初二日

諭大學士伊桑阿王熙梁清標學士凱音布朱都納邁圖索納和彭孫適李振裕郭琇

祀事所關重大凡在執事官皆先期習儀昨者祀

天壇時光祿寺卿達蘇喀既預行演習乃於進福酒時

先期誤跪而復起後於獻酒盃時又復錯誤今日啓奏  
時詢彼衙門事務所奏甚屬朦昧其人庸劣著解任員  
缺速擬具奏康熙二十七年十一月三十日



聖祖仁皇帝御製文第二集卷六

欽定四庫全書

集部

聖祖仁皇帝御製文第二集卷

七至九

臣永瑤恭校

侍讀臣孫球覆勘

覆校官中書臣施光輅

校對官助教臣胡予襄

謄錄監生臣任兆炯

欽定四庫全書

聖祖仁皇帝御製文第二集卷七目錄

勅諭

諭吏戶兵工四部

諭扈從部院諸臣

諭山東巡撫錢珏

諭總督傅臘塔王隲巡撫洪之傑金鉉

諭皇太子

諭扈從部院諸臣

諭浙閩總督王隲

諭扈從部院諸臣

諭內閣

諭戶部

諭刑部

諭內閣

諭大學士伊桑阿

諭禮部

諭禮部

諭大學士伊桑阿阿蘭泰學士凱音布朱都納

邁圖索諾和西安郭世隆

諭禮部

諭禮部

諭戶部

諭戶部

諭吏部



欽定四庫全書

聖祖仁皇帝御製文第二集卷七

勅諭

諭吏戶兵工四部

朕統莅寰宇二十八年於茲早作夜思勤求治理務恤黎庶永圖久安如黃運兩河運道民生攸係朕日切心勞比年工役雖漸有緒而應修應塞議論紛紜曩歲巡幸曾允淮揚士民所請疏濬下河前已興工尚稽底績

欽定四庫全書

聖祖仁皇帝御製文第二集

卷七

屢經廷議請朕親行閱視今特諏吉南巡躬歷河道兼  
欲觀覽民情周知吏治所至沿途供億皆令在京所司  
儲侍一切不取之民間即有日用應需該衙門於所在  
地方照市估平買不許錙銖抑勒小民猶恐地方官吏  
不能悉體朕懷借名科派供應今特頒諭嚴飭如有悖  
旨借端私征者察實即以軍法從事地方文武大小官  
員不許與扈從官員指稱交戚輒通餽遺違者餽送收  
受人員並以軍法從事其扈從大小官員及隨往僉役

如有橫行生事擾民者一并從重治罪朕茲巡省原以軫恤編氓咨諏風俗凡經過地方百姓各安生業務令厘無廢市隴不輟耕毋得倉皇驚避輒滋煩擾其軍民人等懷奸挾詐希逞私憤擅於駐蹕處所瀆行告訐者一槩嚴禁倘有妄控除所告事不與准理外仍嚴加治罪尔部即傳諭扈從大小官員人等並行令各該督撫於府州縣城市邨莊窮鄉僻壤徧懸告示備行曉諭務令通知以副朕惠愛元元至意特諭康熙二十八年正

月初二日

諭扈從部院諸臣

朕巡歷所至再經岱麓重瞻祠宇詢其廟祝知香火荒涼日用難給岱頂諸廟亦復如之念泰山為五嶽之長載在祀典有功社稷不宜使之漸就寥落合將每歲香稅錢糧內量給數百金使上下嶽廟與元君諸祠守祀者得有資賴曉夜盡心兼可時加修葺以壯往來觀瞻示朕崇祀之意爾諸臣即與山東巡撫藩臬會議以聞

康熙二十八年正月

諭山東巡撫錢珏

朕軫恤民隱載舉時巡懋宣德化勤求疾苦比至山東  
所經城邑百姓扶老攜幼夾道歡迎朕問及連歲順成  
民生少得安業第思百姓足則國家充裕若期比戶豐  
盈必以蠲租減賦除其雜派為先邇年以來各省地丁  
錢糧已經節次豁免山東地丁正賦意欲來歲蠲除茲  
因巡幸至此特先諭該撫速行曉示日傳三百里遐邇

僻壤咸使聞知以副朕省耕問俗之意特諭康熙二十八年正月十五日

諭總督傅臘塔王隲巡撫洪之傑金鉉

朕因省察黎庶疾苦兼閱河工巡幸江南便道至浙觀問風俗簡約儀衛鹵簿不設扈從者僅三百餘人頃經維揚民間結綵歡迎盈衢溢巷雖出其恭敬愛戴之誠恐致稍損物力甚為惜之朕視寓內編氓皆吾赤子惟使比戶豐饒即不張結綵幔朕心亦所嘉悅前途經歷

諸郡邑宜體朕意悉為停止又見百姓老幼男婦奔走  
雜遝瞻望恐後未免喧譁擁塞念此行原以為民不嚴  
警蹕但人衆無所區別高崖水次或有傾跌之虞一夫  
不獲其所足軫朕懷此後止於夾道跪迎勿得紊亂追  
趨致有諸患著即詳加曉諭使知朕愛民切實咸為遵  
行特諭康熙二十八年二月

諭皇太子

朕自出京以來歷經河間府與山東之德州濟南泰安

沂州江南之宿遷清河渡黃過淮安高郵揚州諸處見  
一路百姓扶老攜幼夾道歡迎者日有百萬諮問民情  
皆曰數歲豐登民生樂業加以連歲蠲免錢糧禁止雜  
派鄉紳士庶咸被惠澤無可為報惟祝華封願萬壽無  
疆而已朕思何德感動億兆之歡心以至於斯況天下  
至大黎首至衆不加勉強如出於一或有實政及人之  
深耶昨又特蠲江南全省歷年積欠帶徵錢糧二百二  
十餘萬無非使民已足而益求其足之意諭旨既下歡



呼載途吏民咸謂更得休息矣一路晴霽寒暄得宜朕體甚適不必為念知皇太子近狀俱佳亦慰朕懷故特宣示康熙二十八年二月

諭扈從部院諸臣

朕稽古省方咨求治理閱視河道期底平成凡有利於民生必令霑夫實惠茲行次浙省禹陵在望念大禹功德隆盛萬世永賴應行親詣以展企慕之忱其致祭典禮所司即察例舉行政治所先在崇文教江南浙江為

人文萃集之地入學額數應酌量加增永昭弘獎著該督撫詳議奏請江寧鎮江杭州駐防滿洲漢軍兵丁鎮守要地久歷歲時深用軫念應作何恩賚以彰優恤著該部議奏自南巡以來所經過地方官員除八法處分及列款糾劾外凡因公註誤降級留任者俱准與開復降級調用者著帶所降之級留任其經過地方見在監禁人犯除十惡及詔款所不赦等罪並官員犯賊不宥外其餘自康熙二十八年二月十一日以前死罪及軍

流徒罪以下已結未結俱著寬釋以示朕赦罪宥過之意備辦船隻地方各官効力勤勞著該督撫會同奉差官員確查具題各加一級繹夫供役勞苦亦著該督撫察明人數量給恩賞朕屢念民依特蠲租賦總期實德潤澤蒼生近見民間有建立碑亭稱頌德意者雖出羣黎感戴之誠但恐各郡皆然未免致損民力誠使閭閻殷阜則裨益良多碑亭何與焉嗣後亦宜停止江浙錢糧既經蠲豁猶慮有不肖有司借端詞訟朘削民生著

該督撫嚴行禁飭至各處權關原有則例朕舟行所至  
諮訪過關商民每不難於輸納額稅而以稽留關次不  
能速過為苦權關官員理宜遵奉屢頒諭旨恤商惠民  
豈可反貽商民之累自今應力除積弊凡商民抵關交  
納正稅即與放行毋得稽留苛勒以致苦累違者定行  
從重處分朕早夜孜孜惟冀官吏軍民士農商賈無一  
人不獲其所故於民生吏治圖維區畫務極周詳爾等  
可即傳諭俾一體奉行稱朕意焉特諭康熙二十八年

二月十一日

諭浙閩總督王隲

朕巡行江表緬懷禹德躬率羣臣展祭陵廟顧瞻殿廡  
圯傾禮器缺略人役寥寡荒涼增歎愚民風俗崇祀淫  
祠俎豆馨香奔走恐後宜祀之神反多輕忽朕甚慨焉  
在昔帝王陵寢理應隆重培護況大禹道冠百王身勞  
疏鑿奠寧率土至今攸賴豈可因循特書地平天成四  
字懸之宇下著地方官即加修理畢備儀物守祀人役

亦宜增添俾規模弘整歲時嚴肅兼賜銀二百兩給與  
守祀之人此後益令敬慎地方官亦須時為留心以副  
朕尊崇遐慕之懷其即遵諭行特諭康熙二十八年二  
月十六日

諭扈從部院諸臣

朕巡省民生風俗行次浙江見省會兵民俱相和輯生  
齒蕃庶閭里乂安但觀民間習尚好行爭訟爭訟一興  
則不肖有司因緣詐索勢所必至縱或官員無所朘削

而胥吏作奸究不能無私行勒取之弊小民之牽連苦累者多矣夫微忿不捐構成嫌怨小則耗損物力大則傾隕身家其為蠹害不可勝言矜此愚民允宜深戒地方大小衙門官員亦應各簡詞訟勸導閭閻俾守分息爭共安生業又夙聞東南巨商大賈號稱輻輳今朕行歷吳越州郡察其市肆貿遷多係晉省之人而土著者蓋寡良由晉風多儉積累易饒而南人習俗奢靡家無儲蓄日所經營僅供朝夕一遇水旱不登則民生將至

坐困苟不變易陋俗何以致家給人足之風爾等可傳  
諭將軍總督等令家喻戶曉務使敦本興讓崇儉黜浮  
兵民日益協和風俗日益淳樸詞訟日益減少積貯日  
益豐盈則教洽化行朕心實嘉賴焉特諭康熙二十八  
年二月十七日

諭內閣

朕巡行南省往視河道江南淮安諸地方自民人船夫  
皆稱譽前河道總督靳輔思念之不忘且見靳輔濬治



河道上河隄岸修築堅固其於河務既克有濟實心任  
事勞績昭然曩革職太過其以原官致仕例復其原品  
康熙二十八年三月二十一日

諭戶部

國家設官榷稅原以通商裕課利益民生非務取盈致  
滋紛擾朕巡行地方軫恤民隱諄諷利弊有應興革者  
即見諸施行近聞江浙閩廣四省海關於大洋興販商  
船遵照則例徵取稅課原未累民但將沿海地方採捕

魚鰕及貿易小船驟行徵取小民不便今應作何徵收  
俾商民均益著九卿詹事科道會同確議具奏特諭康  
熙二十八年閏三月初十日

諭刑部

時已入夏天氣亢暘農事方殷雨澤未降朕軫念民依  
深為惓切或因刑獄中有無知罹法審擬失平情罪未  
符致干

天和亦未可定茲特遣阿蘭泰徐元文會同三法司將

已結重案見在監禁者逐一詳加審理凡有罪可矜疑  
即與察明事由開列具奏務俾情法允協不致淹滯圜  
扉以副朕省刑恤民至意特諭康熙二十八年閏三月  
二十八日

諭內閣

頃者時已初夏雨澤雖降而猶未霑足其命禮部照前  
祈禱之禮三日禁止殺牲不理刑名事務虔恭齋祓以  
祈甘雨特諭康熙二十八年四月十三日

諭大學士伊桑阿

今歲旱已久其傳諭九卿詹事科道朕與卿等靜處以俟之耶應行應革事有無耶抑何以禱祀而求之耶其會同詳議以聞康熙二十八年四月二十七日

諭禮部

時已仲夏雨澤未霑農事堪憂已經遣官於

太歲

天神

地祇諸壇祈求未應朕衷夙夜靡寧今特遣官於

天壇

地壇

社稷虔行禱祀尔部即察例擇期來奏特諭康熙二十八年五月初六日

諭禮部

自春徂夏時雨愆期朕念切民生躬自刻責祇祓齋居戒飭臣工共圖修省曾經遣官遍禱

天

地神祇微雨雖降未沛祥霖今三伏屆期農事可慮朕心彌切焦勞不遑寧處茲仍潔誠齋戒特遣官於

天壇虔行禱祀尚期仰格

蒼昊下拯黔黎尔部即察例擇日來奏特諭康熙二十八年六月初四日

諭大學士伊桑阿阿蘭泰學士凱音布朱都納邁  
圖索諾和西安郭世隆

八旗叅領佐領有職任之官多有以疾告休者此中亦有以不能騎射畏憚而求罷者夫管轄職任仍須得舊人為佳其傳諭八旗都統副都統等自是以後若此告休者詳察之果疾病不可支者允其休可也若雖不能利於騎射而能管轄者仍留用之康熙二十八年六月二十五日

諭禮部

欽奉

皇太后諭旨皇貴妃孝敬性成淑儀素著鞠育衆子備極恩勤今忽爾遘疾勢在瀕危予心深為軫惜應即立為皇后以示寵褒欽此前者九卿諸臣屢以冊立中宮上請朕心少有思維遷延未許今祇遵

慈諭立皇貴妃佟氏為皇后應行典禮爾部即議具奏特諭康熙二十八年七月初九日

諭禮部

皇后佟氏淑德夙成芳徽懋著侍奉



皇太后克盡孝誠撫育諸子悉均慈愛提躬敬慎御下  
寬仁式備儀型宮闈胥化頃遵

慈諭作配朕躬尚期內治之永襄何意沉疴之難起茲  
於康熙二十八年七月初十日崩逝睽懷懿範痛悼良  
深宜有稱謚以垂永久著內閣翰林院會同擬奏其應  
行典禮爾部詳察速議具奏特諭康熙二十八年七月  
十五日

諭戶部

朕前巡幸江南凡所經歷於編氓疾苦必詳加體察如傷念切每沛恩膏朕過邳州親見彼處田地多為水淹沒耕耘既無所施賦稅如何取辦其現在被淹田畝應納地丁及漕項錢糧俱行蠲免歷年逋欠亦盡與豁除該督撫即行出示徧曉窮鄉仍不時廉察儻有不肖官員仍行私征者題叅從重治罪以副朕愛惜民生至意爾部即遵諭行特諭康熙二十八年七月二十二日

諭戶部

今歲天氣亢暘雨澤鮮少畿輔地方雖不時間已得雨  
然或甘澍未敷或播種後時收穫失望窮民閱歷冬春  
難保必無艱食用是朕衷預念軫恤加殷著差尔部賢  
能司官會同該撫於州縣等處徧行親歷詳加察勘其  
有果係被災者作何贍救使不罹患害著一併察議具  
奏特諭康熙二十八年七月二十二日

諭吏部

自古帝王撫馭寰區端賴宮闈之助惟后德之賢淑王

化本源繫焉內治綦重典禮宜隆爰考歷代冊立中宮  
即推恩所生錫之封爵載在彝章其來舊矣緬維大行  
皇后性秉柔嘉心存恪慎溥寬仁而逮下崇節儉以持  
躬奉事

重闈克抒誠孝撫育衆子均被恩勤方作配於朕躬冀  
永資夫壺教忽爾崩逝殊悼朕懷禮已備乎榮哀恩未  
加於戚畹內大臣舅佟國維乃大行皇后之父也勲舊  
懿親忠貞世篤勞勩夙昭乎環衛謀謨允贊乎巖廊茲

奉

皇太后慈諭大行皇后誕秀名宗丕彰令範懿徽遽謝  
悲怛滋殷思后德之流芳洵良臣之毓慶宜加峻秩以  
協典章朕恪遵

慈命特錫殊恩佟國維著封為一等公給與誥命世襲  
罔替尔部即遵諭行特諭康熙二十八年七月二十八  
日

聖祖仁皇帝御製文第二集卷七

欽定四庫全書

聖祖仁皇帝御製文第二集卷八目錄

勅諭

諭大學士伊桑阿阿蘭泰學士凱音布拜里朱

都納邁圖西安博濟郭世隆王國昌

諭大學士伊桑阿阿蘭泰學士凱音布拜里朱

都納邁圖西安博濟郭世隆王國昌

諭大學士伊桑阿阿蘭泰學士凱音布朱都納

邁圖西安博濟郭世隆王國昌

諭大學士伊桑阿阿蘭泰學士凱音布朱都納

邁圖西安博濟郭世隆王國昌

諭大學士伊桑阿阿蘭泰學士凱音布朱都納

邁圖西安博濟郭世隆王國昌

諭戶部

諭大學士伊桑阿阿蘭泰學士凱音布朱都納

邁圖西安博濟郭世隆王國昌



諭戶部

諭政治典訓館總裁伊桑阿等

諭大學士伊桑阿王熙梁清標徐元文學士凱

音布朱都納邁圖西安博濟郭世隆王國昌

彭孫適顧沂

諭戶部

諭戶部

諭內閣九卿詹事科道

諭內閣

諭皇太子

諭戶部

諭戶部

諭戶部

諭大學士伊桑阿阿蘭泰學士朱都納西安博

濟席喇王國昌

諭內閣

諭內閣九卿詹事科道

諭內閣

諭大學士伊桑阿阿蘭泰學士朱都納西安博  
濟席喇布顏圖王國昌

諭大學士伊桑阿阿蘭泰學士朱都納邁圖西  
安博濟布顏圖郭世隆王國昌

諭內閣

諭內閣



欽定四庫全書

聖祖仁皇帝御製文第二集卷八

勅諭

諭大學士伊桑阿阿蘭泰學士凱音布拜里朱都  
納邁圖西安博濟郭世隆王國昌

理藩院事務所關最要官員缺出應用之人甚少蒙古  
旗阿達哈哈番拜他喇布勒哈番拖沙喇哈番及侍衛  
令各旗都統引見奏聞此中有通習文字者選用康熙

二十八 卷八  
年九月十一日

諭大學士伊桑阿阿蘭泰學士凱音布拜里朱都  
納邁圖西安博濟郭世隆王國昌

今歲旱禾稼未登草豆價值勢必翔貴滿兵馬匹飼養  
為艱可察八旗貧窘護軍甲士特給以養馬錢糧至來  
歲之秋卿等會同滿九卿具議以聞康熙二十八年九  
月十一日

諭大學士伊桑阿阿蘭泰學士凱音布朱都納邁

圖西安博濟郭世隆王國昌

來歸之喀爾喀人衆饑窮至於已極自相攘奪強凌其弱若不速設總理職任遣賢能蒙古王台吉等申明法紀訓化禁禦集其離散之衆必將化離困窮益至於極今冬來春何以爲生其下議政王貝勒大臣會同詳議以聞康熙二十八年九月十一日

諭大學士伊桑阿阿蘭泰學士凱音布朱都納邁

圖西安博濟郭世隆王國昌

佐領伊庫等所送黑龍江官莊壯丁若至其地已過耕種之時則無所得食矣可遣戶部司官一人往察之果逾耕種之期無食者量與之粟以養贍之其下戶部康熙二十八年九月十八日

諭大學士伊桑阿阿蘭泰學士凱音布朱都納邁  
圖西安博濟郭世隆王國昌

直隸所屬被災地方其一歲錢糧為數若干湖廣之湖北所屬被災地方其一歲錢糧為數若干速察之今日



即以聞康熙二十八年九月十八日

諭戶部

朕勤求治理篤念民依欲使婦子幹寧用是頻蠲租賦  
至於時值荒歉倍切焦思賑贍之恩尤宜亟沛今歲畿  
輔亢暘為虐播種愆期年穀不登小民艱食旱灾情形  
朕所親見夙夜殷勞軫念已久顧此熒熒之民餬口尚  
不能給若更責以輸賦必致流移失業直隸被災州縣  
衛所所有本年地丁各項錢糧除已徵在官外其餘未

經徵收及康熙二十九年上半年錢糧盡行蠲免尔部  
速行該撫通行曉諭務使均沾實惠以副朕拯恤窮黎  
至意如民人仍致流散或不肖官役朦混侵蝕及仍行  
私征者將該撫一并嚴加處分尔部即遵諭行特諭康  
熙二十八年九月十八日

諭大學士伊桑阿阿蘭泰學士凱音布朱都納邁  
圖西安博濟郭世隆王國昌

佐領所隸事務洞知詳察乃佐領等官專責此後凡令

稽察之事佐領官所稽察若不明晰昏昧無能者戶部  
叅奏今所察貧窘人戶之事儻朦混不明亦令戶部叅  
奏康熙二十八年九月二十二日

諭戶部

今歲畿內亢暘田畝鮮穫朕所深悉被災人民已加恩  
蠲賑八旗田莊俱在畿輔近地同屬災傷滿洲蒙古漢  
軍甲兵皆須養馬原資禾稼以供飼秣今穀既不登芻  
豆必致湧貴雖給有月餉銀米可以贍育家口貧乏兵

丁經營草料恐滋困累朕殊用軫念著詳察實係窮兵無力養馬者開列名數送部自本年十月起至來年秋成時止其馬匹所需錢糧應加給賜以昭朕一體愛恤兵民之意作何恩給尔部確議具奏特諭康熙二十八年九月二十八日

諭政治典訓館總裁伊桑阿等

朕御極三十年來惟兢兢祗畏常存始勤終怠之虞孜孜不荒每思滿損謙益之戒今閱此書增愧於懷況比

年不登民生未遂地震星變往往頻仍正當君臣上下  
協心同慮撫綏萬邦夙夜黽勉尚且不暇豈容自矜自  
伐以重己過違道取譽以務虛名欲將此書停止編摩  
卿等其議之康熙二十八年九月二十九日

諭大學士伊桑阿王熙梁清標徐元文學士凱音  
布朱都納邁圖西安博濟郭世隆王國昌彭孫  
適顧沂

今歲京師附近地方遇旱穀用勿登小民資生無計雖

錢糧既已蠲免加恩賑賚給以帑金而求糴米粟亦覺維艱依然無食困於生計朕念之每為憫然也頃朕躬詣

山陵所過之地諮問民間疾苦閱視被災情形不僅艱難於米粟而已也雖燔爇之薪藁亦無之饑寒交迫曷以為生若不及時善加賑恤必致流移失所朕日夜焦勞不安於懷今茲適遇饑饉公家莊田及諸王以下大臣庶官殷實人等莊田積聚糧穀可酌量助給又直隸

鄉紳富民有積穀者並令助給散賑其散給帑金務令實給小民以為薪爨之用如此似於饑民方有裨益汝等與九卿詹事科道官會同詳議以聞康熙二十八年十一月初六日

諭戶部

朕念小民衣食惟田畝是賴必年穀順成斯生計無乏若遭罹荒歉饘粥尚且艱難正賦安能輸辦今年湖北亢旱為災已遣官會同該督察勘今據將武昌等府所

屬二十九州縣八衛所災傷分數勘明具奏朕心深用軫念儻不亟加蠲恤恐致流移失所武昌等四府今年錢糧前已全蠲其被災二十州縣四衛所康熙二十九年上半年地丁錢糧著與蠲免荊州安陸二府所屬被災九州縣四衛所本年地丁錢糧除已徵在官外其未經徵收及二十九年上半年錢糧亦盡行蠲免爾部速行該督撫通行曉諭務使均沾實惠以副朕拯濟窮黎至意如民人或致流散不肖官役朦混侵蝕及仍行私



征者將該督撫一并嚴加處分尔部即遵諭行特諭康熙二十八年十一月十八日

諭戶部

朕撫育蒸黎務期休養閭閻疾苦時軫朕懷今覽總督范承勲奏雲南屯地錢糧自康熙二十一年至二十七年每歲拖欠懇請分年帶征朕念雲南百姓前曾供億王師繼又遷移叛屬家口運送勞悴本年正賦輸將尚屬艱難復令帶徵逋租必致益滋困累著將歷年所欠

屯賦銀七萬一千二百餘兩米麥等項十萬七百餘石  
盡行蠲免以示朕軫念民生至意其令該督撫通行曉  
諭務使得沾實惠如有不肖官員仍私自徵比者該督  
撫指名題叅從重治罪尔部即遵諭行特諭康熙二十  
八年十二月初三日

諭內閣九卿詹事科道

今歲京畿遇旱小民餬口維艱數經蠲免錢糧頃雖散  
給賑濟而雨雪尚未及時朕心正爾未安茲雖值新正

上元令節朕軫念小民生計彌切憂勤汝等亦宜體朕軫卹民生至意共加惕勵時廛乃心今當封印之時慎勿各圖逸樂每日皆齊集午門前於救災恤民之道詳悉計議康熙二十八年十二月十八日

諭內閣

朕意於祭祀穀壇文欲更製焉祈穀壇或有一代祀之亦有不祀之者輔臣時輟其祀矣朕以為民祈穀之故肇舉祀事每歲祭文皆因舊詞比年穀未大登民艱於

食夫特為民生致祭祈穀宜悉陳其情愫更製新詞此事內閣九卿詹事掌印不掌印科道官會同詳議來日早奏聞康熙二十八年十二月二十二日

諭皇太子

殿  
時代祭暫安奉

前者朕因災艾忌風未得親詣中心鬱悶五內不安念汝年已長成漸曉事務況好書自得孝友性成朕甚嘉悅所以遣汝恭代大禮今暫遠離足為深念特使內侍馳賜南方新到春橘冬筍脯脩令汝嘗時物耳特諭康

熙二十八年十二月二十三日

諭戶部

朕撫育黎元早夜孜孜惟厚生是亟重念積貯民之大  
命曾屢頒諭旨令各地方大吏督率有司於豐稔之年  
曉諭編氓務令多積米糧俾俯仰有資凶荒可備乃比  
年以來未見實心奉行閭閻蓋藏不能充裕常平積穀  
視等具文即如畿輔近地偶罹旱荒民間蓄積鮮少致  
為補苴之術嗣後直省總督巡撫及司道府州縣官員

於積穀事宜切實舉行務令戶有餘糧倉庾充牣縱遇  
儉歲艱食無虞以副朕愛養生民至意如有仍前玩愒  
苟圖塞責儻遇災歉漫無儲備者將該督撫及地方各  
官一併從重治罪爾部即遵諭通行特諭康熙二十九  
年正月初十日

諭戶部

朕撫御區寓夙夜孜孜惟期厚民之生使漸登殷阜重  
念食為民天必蓋藏素裕而後水旱無虞曾經特頒諭

旨著各地方大吏督率有司曉諭小民務令多積米糧  
庶俾俯仰有資凶荒可備已經通行其各省徧設常平  
及義倉社倉勸諭捐輸米穀亦有旨允行後復有旨常  
平等倉積穀關係最為緊要現今某省實心奉行某省  
奉行不力著再行各該督撫確察具奏朕於積貯一事  
申飭不啻再三藉令所在官司能具體朕心實有儲蓄  
何至如直隸地方偶罹旱災輒為補苴之術嗣後直省  
總督巡撫及司道府州縣官員務宜恪遵屢次諭旨切

實舉行俾家有餘糧倉庾充牣以副朕愛養生民至意  
如有仍前玩愒苟圖塞責漫無積貯者將該管官員及  
總督巡撫一併從重治罪尔部即遵諭通行特諭康熙  
二十九年正月十一日

諭戶部

朕惟阜民之道端在重農必東作功勤然後西成有賴  
畿輔地方去歲遭罹荒歉已經蠲免錢糧特發帑金兼  
支倉粟賑濟雖小民餬口有資其子粒牛具恐多匱乏



今時屆首春田功肇始若弗經營措給將誤俶載之期  
播種不齊倉箱何望直隸被災州縣衛所窮民有不能  
自備牛種等項者該撫督率有司勸諭捐輸及時分行  
助給務令田疇遍得耕易毋致稍有荒蕪八旗官兵皆  
倚屯莊收穫用以資生若有被災貧乏耕作無力者該  
都統等通行各該佐領酌量協助牛種所有莊田勿致  
播種後時以副朕敦本勸農愛養兵民至意尔部即遵  
諭行特諭康熙二十九年正月十二日

諭大學士伊桑阿阿蘭泰學士朱都納西安博濟

席喇王國昌

比年以來部院滿洲司官各處奉差理事頗著勤勞自  
郎中以下有職掌官以上可加察核以頒恩賚是察核  
也分一二三等以為序次其不入等次者各部院堂官  
繕寫摺子啓奏此內有曾經別部題叅而復用者無庸  
序入因公罣誤而復用者仍序之康熙二十九年正月

十三日

諭內閣

外省駐防將軍副都統毋令購買民人誠有此禁未嘗  
禁軍弁買人也祖明雖係副都統祖植檜家奴然現為  
駐防外省之披甲今將駐防外省之家奴而披甲者不  
准購買則征行無跟役之人矣將軍叅疏不符可發回  
之康熙二十九年二月初三日

諭內閣九卿詹事科道

昨歲畿輔荒歉朕慮民食維艱或至流離道路既蠲除

其田租矣復特發帑金三十萬兩并動支常平倉粟令該撫徧行賑貸蓋期災黎得所毋使離散也今聞通衢相近之民雖已獲霑恩澤而僻壤窮簷究不能以自存致於越鄉去土者甚衆夫小民流移若此則司牧大吏所賑救者安在耶前所發三十萬帑金未審如何散給所在人民有無轉徙應遣部院大臣往加詳察至於四方流民率多就食京師今年五城粥廠雖經倍給銀米寬為其期但恐饑氓漸集無以遍贍因克均霑慈惠宜

增設粥廠擇各部滿漢賢能司官俾親賑焉爾等其會議以聞康熙二十九年二月初三日

諭內閣

部院衙門事件恐以朕在外調攝致章疏稀簡可仍照常具奏朕總理自有暇也可通諭各部院知之康熙二十九年二月十八日

諭大學士伊桑阿阿蘭泰學士朱都納西安博濟  
席喇布顏圖王國昌

劫盜被鄰居之人及衆人擒獲或為被盜之家人擒獲  
皆應賞勵盜若抗拒捕者被創應依行間受傷例賞之  
其下該部議奏康熙二十九年三月初七日

諭大學士伊桑阿阿蘭泰學士朱都納邁圖西安  
博濟布顏圖郭世隆王國昌

所諭策汪拉布灘詔書及賞賚之物令理藩院選擇賢  
能司官一員送去交與達瑚著達瑚送往策汪拉布灘  
處自京師所遣官與彼地主事奔璽皆留住邊關達瑚

事竣言旋著馳驛來京此遣去官及達瑚同事之主事  
奔璽仍留邊外偵取消息不時奏報達瑚既迅速啓行  
所騎牲口及食物等項地方官毋得稽悞贍給充足令  
其前往可交理藩院兵部康熙二十九年四月初四日

諭內閣

此時亢旱米價翔貴八旗官兵秋季應支米石可預給  
其半康熙二十九年四月十六日

諭內閣

天時旱乾圉圉重罪已令清理今所在祈禱望雨甚殷  
除死犯以外凡拘禁枷號鞭責等罪咸從寬釋之康熙  
二十九年四月十六日

聖祖仁皇帝御製文第二集卷八